


T O L E T V M



TOLETVM, Plinio & Taraphe Serezola, Hispaniæ vmbilicum obtinere videtur, cuius inæqualis cliuosus, & asperior situs, satis difficilē in eam ascēsum præbet. Maiorem eius partē nobilissimus ille fluuius Tagus, aureis celebratus arenis, alluit, & ab hostium tuetur conatibus. Reliqua verò pars, quæ ad arcticum polum spectat, muris validissimis, & centum quinquaginta turribus tuta est valdeq; munita. Hanc ab Hercule ædificatam esse, fabulantur plerique. L. Marineus Siculus & Tarapha ex Boderico Toletano eam conditam commemorant à Tolemone & Bruto Consulibus, annis C VII. antè quàm Iulius Cæsar regnare cœpisset. Est autem in præstantissima hac vrbe magnus equitum numerus, & illustrium virorum splendor maximus, ciuiumque frequens & maxima multitudo: Sacerdotibus etiam est venerabilis, & disciplinis liberis exculta, artibusq; mechanicis & officiis adornata, mercatorumq; commercijs admodum diues, præsertim lanificio & serico, quibus duobus officijs viuunt in hac vrbe hominum milia ferè decem. Diuiditur Toletum in regiones tres & viginti, eas amplissimum & pulcherrimum nobilitat templum, quod omnes sacras ædes, & forma cōspicua, & magnificis ædificijs, Sacerdotumq; ministerijs, & ditissimis ornamentis antecedit. Huius Ecclesiæ Archiepiscopus Urbanus II. totius Hispaniæ primatem, instituit. Hinc Tolertanus Antistes, secundus à Rege, non dignitate solū & autoritate, verum etiā populis, vectigalibus, atq; potētia, sub cuius imperio, præter alios minores populos, oppida nobilissima ac memorabilia XVII. gubernantur. Sunt & hic permulta monachorum & monialium monasteria, Fora venalia, XVII. in quibus omnium rerum copia semper abundat. Sunt & Hospitalia duo, quorum alterum redditus habet ducentorum millia quinque, quibus infirmi curantur, & infantes expositi aluntur, quorum quidem semper magnus est numerus. Alterum verò, cuius redditus propè duo millia ducatorum, in quo curantur homines Gallico morbo laborantes. Est & aliud memorabile, vbi degunt & aluntur homines sensu carentes, in quo præterea duodecim senes & vita probi, qui labores ferre, & victum quærere nequeunt, aluntur. Vicos autem propter domorum frequentiam dēsitatemque plures habet angustos, qui propter ascensum & descensum sunt ambulatu difficiles. Cæterum domus magnæ sunt, & intus pulchriores ac commodiores, quàm foris videntur. Seruiunt Tolertanæ ciuitati tanquam domiræ multis & varijs rebus oppida multa, pagorumque maximus numerus. Qui quidem ciuitatem diuitem faciunt, & rebus omnibus abundantem. Hæc L. Marineus Siculus lib. 2. de Lusitania.

P I N C I A V V L G O V A L L A D O L I D.



PINCI A oppidum, omnium, quæ sunt in Hispania, maximum ac nobilissimum, quod Vallisolerum, vulgò Valladolid vocant. De quo L. Marineus Siculus lib. 3. de rebus Hispaniæ hunc in modum scribit. Huic oppido quas vrbes & ciuitates anteponam non inuenio. Est enim in optimo loco situm in Pisuergæ fluminis amœnissima ripa, liberalibus disciplinis & mechanicis artibus excultū, Aedificijs sacris, ædibus, cenobijs & duobus collegijs ornatissimum. Mercatorum cōmercijs & omnium rerum copia ditissimū. Vicis, plateis, muris illustre, Campis, fluminibus, hortis, fontibus amœnissimum. In quo præter alias res memorabiles, forum est venale amplissimum & pulcherrimum. In cuius ambitu, qui passus septingentos amplectitur, trecentas & triginta ianuas, & fenestrarum tria millia numerauimus, & omnia vidimus officia. Huic foro coniunctus est vicus conspicuus, qui ab argentarijs opificibus Argētarius dicitur. Quapropter hoc oppidum cū ciuitas non est, multis tamen ciuitatibus, etiam primarijs non immeritò præfertur. A regibus Hispaniæ præsertim, qui hoc oppidum quasi domicilium placidissimum frequentant. In quo omnes ferè Hispaniæ magnates ædificant & libentissimè morantur. Hinc Orientem versus Cabeconiana sublimis arx aspicitur supra fluminis eiusdem ripam. Vnde non longum distat oppidum Donia, soli fertilitate diues, & Catholicorum Regum coniugio memorata. Item Palentia nobilissima ciuitas in amnis Carrionis margine sita, vbi quōdam literarum gymnasium fuisse memorant, quod postea Salmanricum translatus fuit. Porro, cū multis de causis celeberrima sit Pincia, multo tamen magnificentior eam reddidit optatissimus D. Philippi Regis Hispaniarum ortus: Quem quidem maximum & potentissimum Regem, non alibi, quàm in potentissima pulcherrimaque vrbe nasci conueniebat.